

1498, Januar 30.

844.

*Schuldverschreibung des Klosters Berge für den Altaristen des Altars der h. Dreifaltigkeit zweiter Fundation in der Petrikirche zu Magdeburg Gerhard Varn über 200 Rheinische Goldgulden.*

Wy Mathias van der gnade godes abbet, Hinricus Botel prior unde Conradus Iacobi Ioannes Thegeder seniores unde de gantze samelinge des closters tho Berghe vor Magdeborgh ordens sancti Benedicti bekennen — dat wy op datum dusses unses openbreves hebben entfangen unde upgenomen van dem erhaftigen herren Gerhardo Varnn altaristenn des altars der hilgen dryfaldicheit der anderen fundacien der parkerken sancti Petri in der olden stadt Magdeborch an beredem getaldem golde twehundert gude Rinsche gulden de wy fordere in unses closters be-teringe nuth behuff unde fromen witliken gekeret unde gewant hebben wur uns des noth unde behuff ist gewest, vor welke twehundert gude Rinsche gulden wy dem upgnanten heren van in unde uth unses closters beredestenn unde gewisten renthen upkomenn unde guderen myt eyndracht vorkofft hebben vorkopen ok in iegennwerdicheyt dusses briffes achte gude Rinsche gulden ierliker renthe unde plege up unser leven frouwen dach lichtmissen na datum dusses brieffes dem upgemelten Gerhardo synen nakomelingen unde inhabberen dusses brieffes dy den altare der hilligen dreyfaldicheyt upgenant in tyden hebben vorder in der vorgnanten olden stadt Magdeborgh tho rekenn uth thogeven unde gutliken tho betalende ane alle hinder vorthoch unde geverde umbekummert ok van allen gerichtten geystlik edder werltlik, ok vorwilligen wy uns weret dat de gnante herre Gerhardt myt den mytgnanten nicht kunde der tynsze also achte gulden genant bekomen moghen se uns myt geystlikem rechte vor nehmen vor unses gnedigesten herren van Magdeborgh official die denne in tyden syn wurde dar wy szo sulvest vor uns unde unse nakomen ingearbitreret hebben dar wedder ok uns unse nakomelinge noch unse gudere nicht fryen fristen ader beschermen schal keynerley geystlik noch werltlik recht noch gericht in sundern edder gemeyne pawstlike edder keyserlike privilegien exemptien edder vorfryinghe dar midde wy edder dat goddeshusz edder orden upgenant vorfryet edder vor andern preeximert ysz edder kunftich werden mochte noch gemeynlik edder sunderlik gantz nicht over all szo ymands hyr weddere erdeneken kann edder mach keynes weges wente wy des alles hir ynne garen unde gantz vorthyen unde begeven. Sunderlik aver szo beholde wy Mathias abbet etc. vor uns unse nakomelinge de macht dat wy sodanne twehundert Rinsche gulden wedder geven moghen deme velegedachten Gerhardo edder synen mytbenomeden wan wy willen unde dat wille wy unde schullen eynen ferndeil iars tho vorenn vorkundigen unde witlik doen vor dem tynszdage vorberurdt dem gnanten Gerhardo edder synen mytgenanten unde up lichtmisse nehst na der vorkundiginghe geven unde betalen dem upgemelten herren twehundert gude Rinsche gulden